

摘藻堂四庫全書薈要

集部

欽定四庫全書薈要

集部

仲弘集卷一至三

臣董誥詳校


詳校官助教臣謝登雋



欽定四庫全書薈要

仲弘集

提要

  
臣等謹案仲弘集八卷元楊載撰載字仲弘  
浦城人後徙杭州初以布衣薦授翰林國史

院編修官調海船萬戶府照磨會復行科舉  
之制遂登延祐二年進士授饒州路同知浮  
梁州事終于寧國路總管府推官焦竑國史

經籍志載楊載仲弘集四卷此本八卷不知何人所分元代詩人世推虞楊范揭史稱其文章一以氣為主而於詩尤有法度自其詩出一洗宋季之陋云云蓋宋代詩派凡數變西崑傷于雕琢一變而為元祐之樸雅元祐傷于平易一變而為江西之生新南渡以後江西宗派盛極而衰江湖諸人欲變之而力不勝于是仄徑旁行相率而為瑣屑寒陋宋

詩于是掃地矣載生于詩道弊壞之後勢窮而變乃復其始風規雅贍雍雍有元祐之遺音史之所稱固非溢美其清思不及范梈秀韻不及楊侯斯權奇飛動尤不及虞集而四家並稱終無忤色蓋以此也世又傳載詩法家數一卷凡鄙舛陋殊難言狀殆粗識字義之人因元史此語而依托之今惟錄載集而詩法家數則別存其目庶幾不溷其真焉乾

隆四十三年四月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

仲弘集原序

大德間余始得浦城楊君仲弘詩讀之恨不識其為人及至京師與余定交商論雅道則未嘗不相與挺掌說也皇慶初仲弘與余同為史官會時有纂述事每同舍下直已而猶相與回翔留署或至見月月盡繼燭相語刻苦澹泊寒暑不易者唯余一二人耳故其後余以御史府用瑯南憲架閣適海上仲弘復登乙卯進士第為浮梁別駕余遷江西仲弘亦改宣城理官相違十數年

相距數千里迹雖如是而心固猶數晨夕也而仲弘竟未任宣城以卒嗚乎慟哉余嘗觀於風騷以降漢魏下至六朝弊矣唐初陳子昂輩乘一時元氣之會卓然起而振之開元大厯之音由是不變至晚宋又極矣今天下同文而治平盛大之音稱者絕少於斯際也方有望於仲弘也天又不年假之豈非命耶蓋仲弘之天稟曠達氣象宏朗開口論議直視千古每大衆廣席占紙命辭教晚橫放盡意所止衆方拘拘已獨坦坦衆方紆餘



已獨馳駿馬之長坂而無畱行故當時好之者雖多而  
知之者絕少要一代之傑作也仲弘有子尚幼其殘藁  
流落未有能為輯次者友人杜君伯原自武夷命僕曰  
將就其平生所得詩刻諸山中此誠知仲弘者而杜君  
猥謂罄仲弘海內之交相好又莫余若也俾為序之用  
掇其梗槩著于篇端致和元年六月一日臨江范梈序

欽定四庫全書薈要卷一萬六千三百八十四

臬部

仲弘集卷一

元 楊載 撰

雪軒

北風海上來大雪何壯哉上下九萬里洗淨無纖埃君  
家十二樓軒窗洞然開吹笙並擊鼓呼賓與銜盃名言  
落四座大咲聲如雷舉頭望長空高興驚冥鴻仙人五  
六輩飛下白雲中粲粲明珠袍相從萬玉童問君何所

事未就丹鼎功翩然却攜手共入蓬萊宮

次方韶父遊九鎖山韻

平生一枝筇畏踏市朝路出門見青山如鶻追狡兔茲  
晨正炎暑赤日那肯算振衣得冷風超若忘世故冥冥  
九鎖雲未睹心已慕想當挾良朋盡取奇絕處曠哉天  
壤間寓物豈為痼歸來思舊丘我服寧改素無官正爾  
佳有子亦堪據誰歟事虛名白首不知誤

桶底圖

巨鰲奮其首戴山出海中神人擇所處共構金銀宮凭  
高開戶牖屈曲互相通女仙七十二顏色如花紅一一  
執樂器奏曲殊未終世傳桃源圖共徵彭澤翁此本出  
異士雕刻尤精工天地極廣大為地當不同我願學仙  
道積久乃有功鍊形去滓穢五色浮虛空一朝乘風去  
浩然入無窮

次景遠學士立春日韻

四首

大雪入歲算其兆為有年漣漣始彌旬父老怨苦寒平

旦上馬去重裘忽如單況彼牛衣子束縕噓微煙賴有  
固窮節猶念及古先

又

古來有道士聲利不寘懷顧於草木微而愛松若梅茲  
辰閱庭戶適逢數花開芳意未渠央是足銜吾盃

又

人事重名實趨向盡百端丈夫負雄氣動欲追古賢於  
意少不愜自放江海邊登高望八極雲氣生我前萬事

何足問所須惟酒錢

又

崎嶇既山曲迢遞亦水濱既見蓬葦士輒復忘為勤得  
之眉睫間我遇固以神所善但樓護豈暇從若人

送淳安徐教諭之任

握手出南城眷眷從此辭蒼茫寒江色日暮浮雲滋大  
舟挾雙櫓輕若駟馬馳淳安衆才彥竝遲得師資擊鼓  
會高堂帷帳春風吹執經列座下質問無留疑平生五

車書少出胸中奇歛然聽佳譽庶用懌我思

贈李尊師

季君神人也冥晦居山中還丹九轉成顏色如兒童致  
虛感元氣語默與天通頻歲傷水旱下民食不充曰雨  
須有雨曰風必有風上帝聞其賢行世多陰功策名紫  
虛府進位稱仙公騎龍上天去此樂無終窮

太古雪為楊友宜賦

往時天大風能吹華山裂陸此一卷石或云太古雪粵

自開闢初雲氣所凝結已經六萬歲變化同截業望之色正白表裏共澄澈塵土不能浣光采耀日月願君勿愛此持以獻金闕回中避暑時持用消毒熱

### 胡氏刺虎圖

浣有烈婦人胡姓嫁劉氏從夫棗陽戍車宿水之溼夜半猛虎至銜夫入菑翳夫人自驚起不暇生為計直前執虎足盡力與牽制呼兒抽佩刀刃刺虎立斃夫命復不救復讐古所貴嗚呼流俗弊人義日以廢婦不失其



夫臣子競為利患難圖苟免聞此得無媿吾故作此詩  
于以告萬世

溪山積雪圖

大雪歸溪山長林晝冥宵檣橋跨絕岸遠望行客少買  
魚酤新酒獨酌竟昏曉似此非他人高士戴安道

偕虞伯生魏雄卿魏池燕集分韻得閣字

侯家有貴客置酒燕池閣溽暑方盛極風雨俄大作移  
楊相簸蕩蒲荷紛偃薄亂呌失蛙黽回翔迷鶴鶴街流

汙穢盡竇湧波濤惡喧聲劇降殺神氣欣洗濯趣歡爭  
酬酢獻笑雜歌謔益弛劒佩嚴未厭觥籌錯調燮維理  
得滌漉宜施博和澤布原野濕烟散城郭嘉蔬已菁菁  
良苗常濯濯吾徒家食餘豫有豐稔樂

題溫日觀墨葡萄

日觀作葡萄電掃無踪迹誰於故紙上點綴辨墨筆西  
天十萬里來往僅瞬息敗關固不小遺下履一隻

題金壇宋氏自怡軒

白雲生何許萌芽自山石厥初僅毫末須臾大充斥蔓  
延塞虛空日月為昏匿或時為霖雨庶類蒙潤澤或隨  
飄風散起滅竟無迹相緣千萬變發色黑青赤畸人飭  
棟宇遠俗喜幽閒開軒納高曠撫翫自怡懌人情慕富  
貴驅逐不暫息轉盼失故常在己何所得上下數千載  
往事猶歷歷於焉服聖訓無用苦沉溺昔年陶隱居常  
作帝王客挂冠神武門作詩寫胸臆超然處物外可謂  
貞且白何以企若人鞠躬修道德

礧松為丁師善作

礧松高百尺磊落多大節連根抱危石古色黑如鐵隆  
冬方沍寒山中積霜雪蘿蒿悉枯死蒼崖猶凍裂此時  
唯老幹峭直不摧折國匠求美材瞻望歎奇絕險阻不  
可致既作復中輟我願驅六丁操斧隳崿嶷得此棟梁  
材持以獻天闕

劉將軍詩

交趾小蠻夷去國將萬里土產無異物其人狀如鬼溼

熱生瘴氣疾者無不死天兵雖南征棄之良有以往年  
鄂州省綏靖失其理交馳赤白囊來告犯邊鄙遣人覘  
虛實在廷孰可使矯矯劉將軍一旦備行李有才兼文  
武不但善弧矢深入險惡地限敵纔一水介者數百人  
視之若螻蟻移文至其國詰問事終始指摘中利害文  
辭更深美報書禮甚恭敝邑何敢爾疆吏爭怨隙構煽  
乃為此賄賂却勿受足以振綱紀威聲聞遠方一邊禍  
為弭國家方全盛武備不可弛如此將帥才宜歌宿衛

士

古木詩

大木生何許乃在泰山隈泰山崖石裂怒水響如雷浸  
潤長膏液根株日以培縱歷千百載霜雪不能摧長安  
天子詔欲築九層臺臺上構宮殿青雲共徘徊匠氏走  
海內博求棟梁材萬夫治道路揮斧重林開大器當大  
用小器易剪裁有如豪侈士蹤跡困塵埃適可厚自養  
毋為興歎哀

東山詩為葉子實賦

東山高幾許上有浮空雲葉君居其間好道風所聞窮  
年絕人事斲坐攷遺文松關晝常掩石田朝自芸蓀真  
去汨昏養息襲氤氲軒冕有遺策高舉謝世紛悠悠阻  
林莽長與麋鹿羣繇來巢許臣不事堯舜君

題恒齋

精金有恒質入火受百鍊君子有恒性寧逐外物變既  
不慕富貴又不厭貧賤素履往無咎夷險隨所踐張侯

老世故此義頗深見勉之復勉之繼之在無倦

次仲實見寄韻

平居憶故舊懷抱輒不佳興來望浮雲悵恨獨舉盃  
奇文孰能賞高言孰能偕茲辰辱使至喜有意問來  
諷誦劇傾倒百過卷且開得知賢者心出處無安排  
山嶽縱可移厥高固崔嵬敝廬邇喧市卑濕苦病骸  
常念川路修杖屨安得陪撫事意疎散毋論與俗乖  
猶恐戰不勝常處澗谷隈斯言弗果踐臨風重徘徊



題文丞相書梅堂

大厦就傾覆難以一木支惟公抱忠義挺然出天姿死  
既得所處自顧乃不疑惻愴大江南名與日月垂我行  
見遺墨再拜墮涕洟名堂有深意亦唯歲寒枝可知平  
昔心慷慨非一時義義著棟宇昭昭示民知勿使風雨  
敗永慰千古思

塞上曲

沙塞何窅窅樹短百草長大河屈曲流不復辨四方驅

車日將夕黑雲隱長岡人馬俱飢疲解鞍飲寒塘張坐  
逐平地擊火燒烏羊捫酪過醇酎搖艷盈盃觴既醉謠  
嗚嗚頓蹋如驚狂月從天外來耿耿流素光悲風動寥  
廓拂面吹嚴霜白雁中夜飛參差自成行一箭落霜羽  
挾弓負豪彊中情無留滯千載能鷹揚

邑中南峰陳翁義莊

骨肉分枝葉由來同一身榮枯不相待此富或彼貧君  
子尚周急況復在親親昧茲損益理有醜獨何人南峰

有善士義勇超常倫  
焦心視末俗變化何由淳  
孰利佳田園壑舟固有神  
割之惠宗族乃以成吾仁  
仰止文正公遺法實所循  
垂名倘不朽當與斯人均

偶題

叢生園中草蔚蔚媚幽姿  
乘時各敷榮皓色被綠枝  
似有微香發秋風輒吹之  
入人襟袖中亦復可憐茲  
詰朝步荒畦莖葉稍離披  
飄零即已矣霜露不爾私  
榮悴既有時小大何異而  
幸愛七尺軀天道不可誣

夢讀退之詩頗奇詭已覺記其大旨作此篇

自聞蓬萊山大林夾長巒上生癭藤蘿下生荆榛管仰  
不見天日藏蓄霧雨寒仙聖常所處沮洳亦少乾雖云  
誇鳳凰出入傷羽翰哀音起空洞令人鼻準酸我欲訴  
上帝為施鐵鑿鑽琢落石側裂化為千丈磬瓊樓與玉  
殿玲瓏相通寬日月交戶牖光射青琅玕而我從吾師  
來遊樂且般呼吸養元氣華腴生肺肝萬劫永不死如  
循環無端竊為仙聖慮炳然心若丹上帝如許我致此

亦何難

雪後次鄭集之韻

雪後登高望江山信奇哉重岡起且伏相連白皚皚水  
官方謝事雲氣霽然開六龍翻滄海赤日從東來萬物  
將蠢動忽如登春臺木行味正酸含菱先屬梅天時亦  
相應初昏占斗魁遨遊自茲始入林踐蒼苔西湖青澗  
澗西山高崔嵬長松更千載老枝多折摧名僧勦精舍  
靜謐依巖隈伊予實放士正可誅蒿萊情深惟痛飲毋

客發新醅家人欲求我但見白雲堆機心無自作可使  
絕嫌猜君辭如泉酒我醉如山顏卜居同里巷時時得  
追陪為瓶或先罄此恥當及壘大雅歌治世其音不宜  
哀有倡必有和愧我非長才美哉春雪篇雲漢共昭回

次劉師魯韻

三年客塞上日夜懷舊丘飢來迫我去何暇為遠謀四  
顧無一親此身如羈囚悲風動沙漠回首令人愁道路已  
漫漫歲月復悠悠丈夫四方志至此何所求買船發河

上河水亦南流攜鉏理荒圃吾疾日已瘳飛雁至江潞  
北風天始涼是時禾黍登斯人亦少康皇天降厚德胡  
為私一方燕趙及齊魯人飢或相戕奈何有積廩如陵  
復如岡生非肉食者此憂心甚長亟謀樹臯壤剪茅覆  
小堂我志亦易豐歲祀有特羊

夏夜偕田郎中宿張子元家田君有詩用韻

長日氣甚昏欲睡不可忍薄莫更飲酒趣取大白引坐  
久輒醒然累語加況矧高情逸世表遂使名迹泯鄙人

較是非違者但微哂交遊半天下公輩獨英敏

橘中篇

竝海無山林莽莽皆平疇君家擇地利卽此營菟裘  
樹作藩屏青紅間綢繆其中植橘柚擁蔽枝葉稠盛夏  
開白華朱實懸高秋飛霜虐萬物寒風助颼颼凌晨察  
變候策杖巡維陬是何黃金多暴露宜藏收採摘資衆  
力轉輸及佗州子長傳貨殖謂此同列侯上充國家賦  
下貽筐筥謀千縑可坐致何必龍陽洲



次袁伯長韻

盤盤海底石竝樹青琅玕至陽生至陰龍宮常苦寒揚  
光炫朝彩吐氣烝微瀾根株厯千載莫測勞悴端端如  
巢居子草木皮衣冠超然去人羣取友蹄與翰日誦黃  
帝言浩歎淚闌干奈何天下治必以雲為官佩劒黃金  
環咀丹白玉盤自聞至人德積熱生肺肝黃塵日算起  
對面不相看三山在何處使我師王韓聊歌紫芝曲倚  
君清夜彈

題屏風畫商山四老人

飛雪灑遙野衝波蕩無垠  
蟠蟠山谷間居此四老人  
下為民庶師上作王家賓  
清風眇何許馳想寂寞濱

李御史之陝

秦中古帝都遺俗五方并  
君為監御史出治周百城  
上當采民風下當宣德明  
赫赫英威振奸惡皆振驚  
弭節事觀覽慷慨有高情  
宅土稱上腴后稷此躬耕  
秬稌既充實烝民日已生  
我行半天下留滯客燕京  
岷然岐山

嶺嘗致鳳凰鳴騄駼不可追矯首望去旌贈詩聊自寫  
寸心西向傾

遣興偶作

春蔬茂前畦萋萋有顏色珍禽叫深樹過耳亦一適用  
是易吾慮毋為自襞積放浪天地間無今亦無昔古人  
得意處相與元不隔如何故人心未照我胸臆徵言極  
纖芥實出左右力豈憚絕繫蹢人生且為客

書懷寄杜原父三首

吾生何為者，穉年志頗高。神仙與功名，壯思躍秋濤。  
中宵豈無寐，悲甚幾欲號。後來失所養，百數患難逃。竭力  
奉甘旨，出入身甚勞。舊書益遺忘，九牛存一毛。稍後與  
人事，忍情如忍刀。旦夕自惟念，未足非兒曹。常欲力道  
德，屢失迷所操。區區習蠹簡，對案夜焚膏。倘然有所得，  
中心樂陶陶。忽如從古人，握手共遊遨。攜持亦何事，庶  
用娛蓬蒿。追思作詠歌，示之必賢豪。

丈夫生世間，毋論賤與貧。夙發多意氣，往往惟任真。松柏生高岡，挺然固

出羣不為霜雪阨不為風雨春得時可行道節義亦足  
伸吾生托下土所識凡幾人窮交獨相慰咲語亦復親

又

遙望山下雲旦起迷羣岫老鶴巢其中縹緲標未構長  
鳴對秋月鳴罷復俛味散入墟落間聞者莫能究顧惟  
雲外客娛心飲醇酎於此何如哉吾亦有所遘往來常  
泛舟沂流浙江上是時秋風高濤水日夕壯瞬息踰百  
里猛捷莫可狀倚船縱觀久力可騎鯨況顧謂吾友言

為樂頗豪放斟酌尊中酒懷抱益虛曠常從山中遊實  
愛巖谷幽長松蔭泉水四時清如秋佇立輒良久忽欲  
忘其儔吾聞古來人山居多名流此語或可信市朝安  
得留

黃天祥衍三天數求詩

嘗論術數書其變難盡紀為之非賢聖亦多有妙理造  
端無大異據六甲五子分門復析類包括備終始黃生  
衍三天有名聞遠邇蔓延善推測布算加積累吾行徧

天下所見亦多矣。如生豈易得詣實不虛美往來江海  
上宿留隨所止省識凡幾人孰為豪傑士歲月瞥眼過  
春花既紛萎蕭條卧旅邸風雨響窗紙勸生遊京師北  
走五千里貴人多問命禍福常自擬兢兢恐跼墜有甚  
履淵水為言微無咎抵掌必歡喜微名何足取奮步從  
此起

題史仲憲重修三皇廟

史君宰宜黃政績頗殊異庶不至苟取明不可壅蔽有

詔行括田使者自臨視限期已促迫責在州縣吏乘時  
自掊尅上下受其弊君不憚勞苦日夜親算計頃畝無  
增損成書極根柢隣壤大盜起相約不犯界三皇大聖  
人典祀承國制捐金修廟學首政繫瞻視事事有條理  
後來藐難繼集賢秉直筆稱述傳後世當令處風憲擇  
才頗詳諦一朝任擊搏風采必嚴厲英主方在上明見  
萬里外鄙詩或流聞亦可當獻替

贈無極進上人



進公宗門秀高標如長松霜雪亦摧折夭矯化為龍燕  
坐大道場五戒為垣墉魔賊悉散走不復事戰攻禪居  
閔青峭窗戶加雲封長日語聲絕風動欄牙鐘

贈執中允上人

南山多白雲澶漫塞崖谷中有龐良叟寂寞卧林屋前  
門樹高松後戶植幽竹孤風相纏繞波濤驚蕩沃梵丈  
五千卷誦說盡精熟時時發清唱鏗鏘擊金玉伊余走  
海內一見輒嘆服願言從之遊淡泊心自足

靈龜篇為陳渭叟作馬尊師所画芝龜也

蒼龜生中山深阻絕中道不飲亦不食靈和中自抱姬  
休凝神液巖上產芝草支干集五采相射顏色好彼遊  
江海上作計苦不早一罹豫且罔性命莫能保歸遺宋  
元君天意資探討築宮修祠祭相承以為寶神者固如  
斯遺骨易枯槁古聞蒙莊氏苦語欲相曉持為衛生經  
千載長不老

仲弘集卷一

欽定四庫全書薈要卷一萬六千三百八十五

集部

仲弘集卷二

元 楊載 撰

送凌吉叟

大江風雨暗此日送行舟  
會合能無間攜離祇自愁  
棄繻才足恃題柱志初酬  
請看秋鴻舉冥冥獨未休

又

末俗唯無侶吾儒氣亦卑  
相從謀飲食那復敬師資  
衆

已欺王式吾猶信不疑可憐如鷦雀擾擾在藩籬

初陽臺望月

彩雲相冪厯華露共嬋娟在水渾疑墮當空孰使懸潛  
虬精魄動宿鶴羽毛鮮寂寂丹臺夜相從訝得仙

次韶卿壬寅元日又三日聞遊人頗盛之作韻

堂堂宵雨過栗栗曉寒仍獻歲人同得東郊事復興杜  
門疑我拙有句愛君能且驗臨堦草從今日漸增

寄劉師魯

好在劉公子遨遊興若何江湖勞悵望歲月劇奔波迹  
寄天涯遠詩傳海內多前賢題詠處一一為經過

又

想君遊宦處正值洞庭湖落日波濤壯晴天島嶼孤舟  
航通漢沔風物覽衡巫天下文章散非君孰起予

龍井

元造生羣物唯龍德最靈作霖蘇亢旱取水竭滄溟變  
化無留迹蜿蜒善養形壯哉吾羨汝一躍上青冥

贈吾子行

春雨連城濶春雲映戶多  
長衢方淖淥小水亦風波  
慎獨能如此思君可若何  
便當乘興去著屣一相過

東陽十題

焦桐

只作全生計唯存半死心  
芻蕘猶不置斤斧重相尋  
遂使焦釜誰為愛古琴有材不足恃  
愁絕念知音

蠹簡

往古韋編在何年始汗青蠹蟲深卜宅科斗少成形泯  
滅阡秦火搜羅出漢廷斯文天未喪不敢望全經

破硯

彼美端溪石家藏歲月多廉隅皆破缺筋力盡研磨玉  
亦堅而已星如粲者何向來曾自詭持用掇高科

殘画

斷裂無邊幅華堂棄置餘蒼松深踞地白鶴上凌虛風  
格猶森若丹青總翳如苦心絕人事誰見用功初



舊劍

匣裏雌雄劍通神世所聞潛精依厚地吐氣切高雲亦有蛟龍害寧無星斗文不逢雷煥識埋沒復何云

塵鏡

收藏無寶匣歎息網絲懸孰使明為暗如觀醜勝妍玉臺終寂寂金鵲尚翩翩政訝開元日虛將盛事傳

廢檠

二尺書檠在如今久棄捐魚膏雖有焰蠹簡獨無緣牆

下偕遺礫窗間帶舊烟却觀提挈處辛苦悔當年

敗裘

寂寞牛衣子能無敝緼袍塵埃須浣濯蟣蝨費爬搔  
意味存雞肋寒涼視馬毛千金既銷鑠猶聽朔風號

斷碑

摩挲不成讀上有蘇斑斑字畫鍾王輩文章漢魏間  
龜趺凋顛螭首落孱顏渤海神明遠今同磴石頑

卧鐘

漢殿經焚後喟然卧草中雕殘牙板廢鏤澁土花蒙追  
蠹難陳力華鯨不奏功待賢初設簾想見古人風

送屠存博

君住金陵郡於予亦有聞海環平野盡山出大江分未  
召元司馬誰憐鄭廣文自今師道立章薦必紛紛

又

江左知名士唯君德最淳明經初試吏食祿可榮親矯  
矯能違世棲棲直為貧朝廷求俊乂未易捨斯人

渡江寄俞仲連

舟濟大江濱中流日欲曛  
鹵翻沙際雪潮落渡頭雲  
鯨躍常知候鴻飛不亂羣  
頗思論勝槩把酒莫如君

奉題伯父雙峰樵隱

山出雙峰秀溪流一派清  
土風存禮讓人事省將迎  
路逐高低過田隨早晚耕  
家林有如此南望每關情

又

童稚離桑梓猶能憶故山  
雲峰乘白腳蘚石露蒼顏  
插

架詩書富應門禮義閒綠林遺我恨回首淚闌珊

又

石樹盤根瘦沙溪激浪清竹間看犢卧木末見人行  
稽事常分力樵歌輒和聲從來攜杖處不礙白雲生

又

山曲兩三家相過路不賒對門開竹逕臨水種梅花  
酒熟留人醉詩成任客誇時時談舊事相看鬢垂華

又

草滿三春綠山留萬古青呼兒欣解意應俗憚勞形採  
菌敲寒水收魚照夜汀祇應老崖谷束帶尚論經

贈方韶父處士

蜀郡蘇明允襄陽孟浩然成名兼二子得句詫羣賢口  
絕人間事身如物外仙卓然能有此未信獨無傳

又

古賢皆眇邈不意見斯人得趣時時好吟詩句句新挈  
舟來訪友覽勝輒經旬別業稠山下歸歟願比隣

和孟東野題崑山寺

蘭若負崑岡鑿崖安佛牀  
梯雲石磴滑入厨泉水香  
旦寒鳥相聚月黑龍放光  
舟行苦局促幸憩殊勝場

送方韶父先輩遊五湖

蕭蕭垂素髮渺渺汎滄波  
過眼江山好離家日月多  
詩名終不朽世事復如何  
一往五湖上蒼茫問釣蓑

和張仲實之吳興舟行雜詠

水程通百里雲樹隔千層  
鶴髮歡相見龍門羨獨登  
文

辭無乃壯栲尚能勝仰止情何極吾為附驥繩

又

風流須我輩邂逅及斯時道術懷經濟文章出咲嘻由  
來天下士絕異里中兒它日金閨彥媚媚想翠睂



仲弘集卷二

欽定四庫全書薈要卷一萬六千三百八十六

集部

仲弘集卷三

元 楊載 撰

寄題羅氏別業 二首

溪行如百里為地已幽深  
石轉黃金塢山抽碧玉簪  
盃觴酬日月弦誦起雲林  
樂事無終極誰能得此心

又

門前臨白逕長日少人行  
野樹重重暗溪流脉脉清  
山

光元不斷雲氣自相縈已似龐公隱何時重入城

江行次韻六首

潮頭終歲白沙腹有時皤利涉他州施終更古戍戈天  
依臨海樹風作滿江波亦有投竿意還聽孺子歌

又

舊事如遺迹新愁轉泥人晴天宜縱步凍草各含春野  
鵲飛林杪沙鷗過水濱江山故如此晚望及斯辰

又

藜羹真我食薜荔亦吾衣養性隨時足全生徇物非秋  
蓬猶未定風樹莫相違謾作烟霞想曾無羽翼飛

又

春花聊共采若木有誰編浩蕩寧無取紛華幸見憐緒  
風吹四裔清露洗重玄萬物皆生意蹉跎畏此年

又

路僻行來好天清望極遐白魚翻急浪黃犢卧晴沙柳  
吐千條葉梅殘幾樹花佳辰從此數厯厯看韶華

又

子胥因諫戮茲事幾經秋  
顧爾忠難掩于今憤不休  
天風吹地轉海水入江流  
欲問鴟夷處茫然使我愁

酬子行初秋風颶之作

算夜風濤變崩騰怒不休  
魚龍皆失穴江海欲同流  
竝岸漂千舍連檣覆萬艘  
陰陽知有沴惻愴動深憂

送孫大方歸朝元宮

高卧林泉表超然謝世紛  
空山鳴白雨古石繫蒼雲  
不

作夔龍伍甘從鹿豕羣都門遊宦客回首總慙君

又

飛構上凌空依稀想故宮金盤凝曉露玉佩振秋風  
溟津那違俗支離更養蒙大還何日就變化入無窮

又

為棲因地勢四面盡青山路落秋城外河流曉樹間  
雁飛雲漠漠龍現雨珊珊建木光華盛何時共折攀

挽饒國吳文康公詩二首

厚德修天爵崇資拜地官粲然周典禮偉甚漢衣冠共  
喜懸金印俄聞蓋玉棺史臣書寵數光照碧巔岏

又

道學繇賢子推恩自聖皇白茅分壤土華袞賜衣裳漫  
注長生籙虛傳卻老方神遊終不返瀛海路茫茫

題張氏順堂

百順名為福紛然會此堂詩書成蘊藉黍稷發馨香夜  
戶鳴琴瑟春筵酌酒漿子孫宜孟晉相繼謁明光

題信州先天觀圖

四首

回環因地勢制作本人謀蔽日來龍駕凌空結蜃樓秋  
琴翻浩蕩夜磬答深幽願受長生訣他年幸一遊

又

高林褰翠氣虛谷散虹光道士多騎虎仙人自牧羊澗  
泉通地遠山嶺際天長戴子文為記流傳示不忘

又

四圍山不斷狀若碧芙蓉谷遠含風細崖深下露濃茂



林藏虎豹隱洞伏蛟龍恍惚神人降浮空羽蓋重

又

鬼神相與處燒藥易成功雲霧生牀下雷霆起室中養  
身唯淡泊遊世等虛空高舉寧無日飄然獨馭風

次引後儀公題蘭竹卷子韻

樹蕙連叢竹祇應族類同相依巖石畔併入畫圖中勁  
葉凝清露危梢倚碧空諒非高世士此意固難通

贈程景純二首

南遊觀楚越北渡覽幽燕  
羈旅新愁換英豪往事傳  
塵沙迷遠驛風雨暗長川  
好醉新豐酒清朝正選賢

又

論士無他術先觀氣盛衰  
澗松多勁節瓊樹有高枝  
圖籍曾無覽弓旌詎久遺  
似君宜努力慎莫負明時

思菴

閔氏青山下遺封見若堂  
蓼莪恩未泯拱木恨難忘  
德業銘金石詩書塞棟梁  
子孫修學術奕世有輝光

赤壁圖

寂寂長江夜同人共泛舟清尊方淡蕩孤棹且夷猶望  
遠幽禽度歌長獨璽抽千年遺跡在不逐水東流

贈昌上人二首

山中明月小壠上白雲多旦食餐松柏秋衣攬薜蘿俗  
人希見問禪老每相過異日高僧傳垂名定不磨

又

未生天地始此理固存存直木何由曲清源不可渾養

生母過厚守道在彌敦超出塵埃網  
斬師共與論

送葉彥中之官行臺二首

范滂將攬轡周景已題輿九扈名兼美  
三鱣兆豈虛都門愁摻袂江徼喜沿書  
重有斑衣奉南州總不如

又

大府徵才士知君學業優兩京勞侍從  
十載困淹留白雪歌難和青雲志易酬  
鍾山多勝槩有意與同遊

送胡秀才歸新安二首

明詔方求士知君有俊才未聞遺杞梓何事返蒿萊似  
驥寧淹足為龍豈暴腮文章成錦繡他日必重來

又

彼美逢衣子遨遊至上京雲霄方有志塵土已知名塞  
雁驚新恨溪鷗憶舊盟秋風吹易水惆悵復南征

惠崇古木寒鴉

江上秋雲薄寒鴉散亂飛未明常競噪向晚復爭歸似  
怯霜威重仍嫌樹影稀老僧修止觀寫物固精微

留別陳益謙

大帆仍疾駛雙棹復夷猶  
曉岸烟沙濶春江霧雨稠  
桃花隨漲水荇菜逐長流  
遲子來京國何時賦壯遊

遊陳氏園偕李治中張提舉

曉日從千騎郊原樂事多  
溪山春與麗烟靄晝相和  
宿蠹藏編冊鳴騶隔薜蘿  
使君辭滿引起舞亦傒傒

挽艾處士二首

才行能震美終身作布衣  
江湖名自遠塵土迹還稀  
野

菊秋霜薄岩松夕照微沙鷗盟未改忽忽下漁磯

又

撰文來相府書字出詞垣盛事傳千載幽光發九原父  
賢宜竝著子孝復堪論多少衣冠族無聞愧後昆

顧氏義塾

居鄉為義塾茲事罕前聞外戶來衿佩中堂蓄典墳儒  
宗先麗澤聖德尚彌文吳下多豪族能賢總羨君

挽吳道士

曾為方外士抗迹出塵氛既草歸田賦仍書誓墓文卧  
牛空有兆紀鶴竟無聞春草年年合誰憐道士墳

送林季羽入京宿衛

三首

青雲自致身磊落見斯人卷袞辭蒼麓垂纓侍紫宸漏  
殘珠閣曉香暖玉爐春倘厭承明事歸來衣錦新

又

終軍方近幸賈誼最能文獨用奇才進應將美譽聞金  
鞍光照地寶劍氣凌雲來往燕臺下同游必羨君



又

衛郎皆世胄之子更才賢意氣雲霄上榮光日月邊都  
俞聞寶訓出入奉瓊筵立志當弘毅功名不偶然

送徐義父入京二首

舊富三冬學今為萬里遊風雲丹鳳闕雨雪黑貂裘南  
土名先著東堂選必優相逢多意氣談笑接名流

又

幽燕向日邊裘馬去翩翩磧迥沙如雪河窮浪入天上

書雙闕下待詔五門前壯節當奇遇無煩媿往賢

贈曇上人 二首

多生為佛子慧達自童蒙蟬蛻凡塵外龍騰覺海中一  
真元不染四大本來空異日叢林下知師繼果公

又

人世百年內都如過隙塵不開心上眼苦愛夢中身城  
市無間日江山又晚春相逢言道好獨覺意相親

贈胡汲古 二首

先生唯達道久矣樂山林致聘無雙璧為生過十金身  
間雲出岫髮短雪盈簪遁世猶吾志同盟欲自今

又

野客何蕭散長年暫出遊風塵唯短褐江海自扁舟有  
迹能來往無心任去留才名今藉甚屈指到枚鄒

送胡汲古之吳中

有客佩蒼精居然得此生山開棲越跡水泝入吳程佚  
老悠悠計傷離戀戀情食菲方未已應不為魚羹

中秋

攬雲憑結構步月上林皋不記金尊竭頻瞻玉宇高神  
清存夜氣天濶數秋毫百尺樓如在何煩卧汝曹

挽曹光益二首

斯人吾所愛不見已經年頗怪魚書絕俄聞鵬賦歸  
魂迷道路遺骨滯山川舊業凋零盡臨風為悵然

又

好學無如子冥冥獨苦心未成梁棟用誰使雪霜侵宿

草孤春意游雲泊太陰憶渠情不已揮淚在衣襟

贈劉時中二首

騷雅誰能繼居然屬大才銳思羅宇宙逸興走風雷處  
勝輕流俗名高震外臺東郊乘大路翼翼待龍媒

又

吳越千餘里君來按轡遊羣公虞罪戾多士想風流決  
事曾無壅觀民輒有憂若人何可得離別重添愁

送王元禮歸平城二首

燕趙多奇士遺風有固然射鵰猶絕藝屠狗亦名賢形  
勢威天下風流號北邊送君歸此地亦欲奮吾鞭

又

牧羊憐馬援投筆困班生侯印終兼綰窮愁實飽更大  
才當用世小挫亦知名快飲桑乾酒能澆氣不平

贈張之翰二首

外臺收掾屬奮步集亨衢落落蟠英氣飄飄發壯圖威  
風聞郡邑行李涉江湖竝轡逢佳友周游興不孤

又

長才當用世進取或殊途  
剗劇曾揮刃銷奸若燎枯  
交游冠蓋盛出入禮儀都有賴  
寬衰俗餘波及腐儒

送陳君佐入京

二首

子欲遊京國程途萬里遙  
束裝辭邑社振旆躡風飈  
學問先餘子飛騰在一朝  
太平知有策必顯聖明朝

又

董子知天道朱雲善易經  
由來登俊乂所以重朝廷  
彼

有譏儒服吾無鼓說鈴君看鴻鵠舉忽忽至青冥

宿延祥觀有感 二首

處世如庸俗胡為淹此留蹉跎悲往日磊落愧前修願  
棄人間事來為物外遊大還如可就猶足訪丹丘

又

瓊館遊仙子超然遠世情言辭多近道豪翰久知名露  
下衣裳溼風來几案清似君居處勝亦足寄吾生

題青田葉叔至野清堂 二首



為堂殊顯敞在野興尤濃  
白水流千折青山繞百重  
樹麻行旆旆蔣木倚童童  
相對漁樵話終朝亦罕逢

又

遠來山異甚龍虎互騫騰  
溪狹灘聲悍林繁雨氣增  
正須求靜坐何事角多能  
謁告還鄉里君堂或可升

送張宣撫使嶺南二首

奉使入蠻烟終軍始妙年  
抗旌辭朔野擊楫渡湘川  
翠竹侵巖際黃茆盡海邊  
狼荒非善地為戒莫留連

又

此行行萬里渺渺極朱崖地勢雖懸隔天威可遠加引  
弓飛惡鳥拔劍斬妖蛇遲子歸來日燕南看雪花

送李侍郎使安南

九秋天色晚萬里送君行馬首塞雲起腰間寶劍橫奉  
揚天子命慰答遠人情直渡蠻江水炎氛一日清

喜雪酬康子淵院使

漠漠連天暗霏霏著地輕欲迷鴉鵲觀先入鳳凰城凍

影篩簾密寒光射隙明  
詰朝宜表賀來歲卜收成

送吳清叔

驛路程雖遠帆風勢甚適  
青山隨岸去白水滿江流  
牢落添新恨繁華憶舊遊  
只今歸去好把釣即槎頭

贈鄭尊師

茫茫雲著地撼撼雨交天  
篁竹連河上青茅盡海邊  
棲遲聊應化放曠且談玄  
相對蒲團坐清風為肅然

黃櫨杖為龔聖與作

嗟哉黃櫟杖吾賴汝扶持未免道途苦無如筋力衰散  
才唯不用大節固多奇老向江湖上提攜得自隨

次夏仲勉韻二首

門前無繫馬屋外有鳴蜩迫近衣冠府蕭條翰墨場雨  
淫憂地溼風暴喜天涼推轂無時已令人憶鄭莊

又

不喜為文富長憂得酒慳尊壘堆案上筆硯棄牆間有  
傳追王績無書繼賈山貴人能慢士往見亦胡顏

冬至次張宣撫韻二首

北去關河遠南歸歲月長  
屠龍雖有技相馬獨無方  
雲水連天暗霜蕪滿地荒  
客遊應未已塵土在衣裳

又

瀛海無消息冥冥鳥道長  
已驚雙鬢短更待兩瞳方  
落日依平嶂洪河入大荒  
憂來那可得揮淚欲沾裳

送吳清叔歸婺

客遊春向暮無日不思歸  
雨給桑麻秀山深笋蕨肥  
薄

醪能屢醉舊社足相依莫道天邊雁衝衝適禍機

與方韶卿望月

月明胡乃爾秋盛故能然匣鏡無纖翳槃珠有許圜寒  
光搖碧海爽氣挾青天幸遇山頭鶴令人夜不眠

孝思亭詩為王心田作

山嶠靄蒼蒼盤旋衛古藏盎溫通地氣赫奕閔天光神  
化倅飛劔前聞驗若堂子孫修祭祀歲久不能忘

淨香亭二首

藝竹蒼崖古為亭白日幽一麾方出守千戶益封侯外  
物從渠屏清樽喜客留楣間標勝語朗詠亦風流

又

翼翼四簷外蕭蕭三選中珠璣穿夜雨幢燾舞天風擁  
袖生清氣開軒近碧空古人雖不見佳興詎無同

酬吾子行

耿耿思朋舊悠悠涉歲華既依秦大姓方問魯東家雅  
道將誰與新詩敢自誇祇今能會合不憚路途賒

偶作

碧草含秋意黃雲起暮容歸鴉昏旦噪去雁有無踪  
酒因循醉朋人邂逅逢身名猶碌碌正坐日踈慵

送劉明卿歸安東

同郡居相遠逢君豈偶然秋天聯席宴寒夜共衾眠  
不為時名役猶嗟俗事牽語離還悵快後會是何年

和張仲實舟行雜詠

莫作匆匆去相隨稍稍觀遠山多意態急水易波瀾把




酒悠然樂扁舟得爾難五湖天下景六月氣常寒

題秋江釣月詩卷

泛跡秋江上而今不計年垂綸牽細浪歌帽破長烟已  
真子兼疑孟浩然後來名未泯題品有高賢



仲弘集卷三



總校官庶吉士臣張能照  
校對官中書臣方維甸  
謄錄監生臣張曾溶